

四庫全書

集部

欽定四庫全書

集部

世宗憲皇帝御製文集卷十三至
五

臣 永瑤 恭 校

侍讀臣 孫球 覆 勘

覆校官主事 臣 李 駿

校對官主簿 臣 郭祚 熾

膳錄監生 臣 劉 能

欽定四庫全書

世宗憲皇帝御製文集卷十三

碑文

景陵聖德神功碑

皇天眷佑我國家顯謨盛烈世世相承

太祖

太宗肇基東土締構鴻圖

世祖混一寰瀛克成駿業篤生我

皇考皇帝亶神聖之姿立君師之極大德廣運健行不
息至明如日至仁如天集皇王之大成亘古今而首出
書契以來罕有倫比以揚

列聖之耿光以裕我無疆大歷服予小子績承基緒既
奉冊寶恭上

尊謚山陵禮畢宜建穹碑頌揚功德欽惟我

皇考臨御六十餘年厚德崇功布護宇宙盈溢簡牒巍
巍乎蕩蕩乎不可殫述謹掇大概鐫勒貞珉用昭垂於

億萬祀叙曰

聖祖合天弘運文武睿哲恭儉寬裕孝敬誠信功德大成仁皇帝諱

世祖體天隆運定統建極英睿欽文大德弘功至仁純孝章皇帝第三子也

母孝康慈和莊懿恭惠溫穆崇天育聖章皇后在妊時孝莊文皇后見

孝康章皇后衣裾若有龍繞知為毓聖之祥逮降誕之

辰異香盈室經日不散五色光華與日並耀宮人內侍
咸所瞻仰天表奇偉耳大聲洪雙瞳日懸隆準岳聳膚
理瑩白皎然玉質舉止嚴重性度恢宏敦敏聰明出言
中理辛丑正月嗣登大寶時甫八齡

孝莊文皇后問所欲對曰惟願天下乂安兆人樂業共
享太平之福

孝莊文皇后動容嘉歎知能荷神器為生民主也自初
讀書十行俱下畧不遺忘講幄既開日與儒臣論難往

復雖烈暑沍寒未嘗暫輟焚膏繼晷常至中宵遜志覃思好古敏求勤篤甚於儒素譚經評史發揮道奧流覽之功徧於七畧爰及緯象聲律算數百家之書莫不觸類洞徹得其精要故知性知天察人倫而明庶物雖一名一物皆研究精微而一以貫之敬

天尊

祖禋祀必親齊明盛服率禮無怠至年踰六十頗艱拜起冬至上辛禘祭羣臣懇請遣官恭代猶必

親詣

郊

廟省視陳設行迎神之禮退居齋幄默致精誠俟禮畢然後旋輅天性純孝事

孝莊文皇后垂三十年致愛盡誠委曲周至從幸時乘馬不離左右道路少仄即下馬扶輦踰嶺則扶掖升降彌加恭謹康熙二十六年冬

孝莊文皇后聖體不豫

皇考親嘗湯藥席地而坐目不交睫衣不解帶者三十
五晝夜逮疾大漸自撰祝詞步禱南郊請減已算以延
慈壽伏地誠懇涕泗交頤至居廬時哀瘠過甚不盥沐
者數十日釋服後仍處偏殿衣布素恭送龍輜每日必
步隨數里朝夕慟戚如初喪終身思慕每一言及聲淚
俱發事

孝惠章皇后垂六十年備極孝養省方江南避暑塞外
必奉鑾輿以行康熙四十九年

孝惠章皇后壽躋七旬

皇考亦年近六旬矣正月元夕宮中張燈設宴躬親起舞稱萬壽觴中外傳為天家盛事友愛裕親王等同問安慈寧宮每叙家人之禮親親之誼久而彌篤其疾也屢親視之其薨也屢親臨之宗室中用其才俊而禮其高年無爵位者亦有常廩自康熙六年始親政事未明求衣日昃忘食數御門延見公卿詳論得失綜理萬幾日有常程靡所稽滯嘗於巡幸之次章奏未至秉燭以

俟或於四鼓披覽達旦遂忘寢息孜孜圖治不自暇逸
歷六十餘年終始惟一虛已求言以廣視聽片詞之善
必蒙采錄或星象示異水旱為沴即命羣下直陳休咎
所起無所隱諱又命督撫諸臣密奏地方利弊所宜興
罷者雖在萬里之外周悉情狀眎若目前審官班祿必
惟其當內自六卿之屬外自縣令以上臨軒召見觀其
可否然後命之其以清修苦節著聞者立行甄擢以勸
有位介冑之士無小大必親試其能開霽天顏從容詢

問寸長微績並加獎勵人皆感激自奮

聖性天授一經覲謁歷久不忘故文武之選程材使器
官得其人人稱其職

皇考智勇天錫廟筭如神三逆未叛之前即燭其終為
悖亂宜早定大計遣大臣趣召之吳三桂果反耿精忠
繼之乃宣睿畧簡禁兵守荊州安慶鎮江為聲勢命諸
王大臣為大將軍分道並進三桂自出至衡州湖南皆
陷王師扼之於岳州用戰艦據江湖斷賊餉道三桂憂

怖死遂拔岳州盡收湖南地由陝西取漢興定四川明年定貴州又明年定雲南逆孽自焚餘黨悉平精忠兵出仙霞旁擾溫台大兵遏之衢州屢摧其鋒遂北入仙霞順流而下精忠自縛軍前溫台賊悉破散尚之信最後反王師北自韶州東自潮州蹙之之信束身乞降其間孫延齡陸梁於桂林王輔臣潰亂於寧羌戈鋌所指不久就俘當賊勢之熾大江以西五嶺以南悉為賊踞烽火幾半海內

皇考默運神謨不動聲色八載之間再定寰宇廓清氛
翳耿精忠之亂鄭經自廈門盜踞下游三府精忠敗大
兵乘勝復三府經遁歸廈門越二年克廈門經遁歸臺
灣以海舟守澎湖為門戶

皇考決策命帥治艨艟以六月乘北風攻澎湖再戰破
之臺灣震驚乞降遂以其地為郡縣海氛起於明季自
鄭成功巢穴茲島傳子經及其孫歷三世出沒為閩南
患至是悉靖察哈兒部布爾尼者元之遺裔其先世納

款獻傳國璽故荷特恩尚主封王父阿布奈漸為狂恣
皇考不忍置之法羈諸盛京俾布爾尼襲封召之不至
遂以所部叛遣將率禁旅討之兩月之內殲厥渠魁招
撫其衆北藩以寧俄羅斯夙慕德化奉職貢乃其邊人
羅剎踞雅克薩城納我逋逃以擾索倫興師徂征拔其
城縱其俘振旅而還會俄羅斯之國王遣使上疏謝罪
命大臣往定邊界東北數千里延及海邊胥隸版圖厄
魯特者元之牧牲人也其頭目噶爾丹梟桀習戰鬥叔

服諸番殘回子數百餘城復與喀爾喀構難潛劫其衆故喀爾喀七旗數十餘萬衆皆稱臣內附

皇考親巡塞外受其朝謁錫之名爵頒諭兩部落息兵寧人噶爾丹顧頑梗弗率以追喀爾喀為名闌入邊界皇考計安藩服躬申天討以康熙三十五年春親統六師由中路直抵克魯倫料賊必逸而西別遣大將由西路進兵土刺噶爾丹聞天兵至棄其輜重連夜西奔恰遇西師於昭木多大破之噶爾丹收合餘衆竄伏窮荒

其冬車駕再出至鄂爾多斯遣使招附明年春又出寧夏循賀蘭山哈密擒其子以獻其族類丹濟拉等潛輸誠款師次狼居胥山天兵四布噶爾丹勢孤援絕仰藥自盡丹濟拉攜其遺骸及子女人口來歸朔漠蕩定其兄子策妄阿喇布坦素與噶爾丹有隙乘其南發潛據其地誘致逋逃種類漸滋因圖青海諸部及西域諸番暗遣人攻拉藏殺之掠據藏地

皇考以

太宗文皇帝時班禪額爾德尼達賴喇嘛知東土有聖人遣使歸命追念厥誠不可以勿救於是分遣諸將率西寧諸路之兵自青海入四川雲南之兵自拉里入整旅前驅不遺一矢遂定藏地復達賴喇嘛之位安西域之衆其他西番諸國無不欣喜感戴委贄恐後軫念東南水患屢勤翠華躬視河淮每步長堤或駕小舟周廻觀覽高下險易瞭若指掌授策河臣罔不奏效開中河以避黃河百八十里之險治下河則疏人字芒稻河注

之江濬蝦鬚諸溝注之海治清河則培高堰塞六壩以蓄其勢開張福口裴家場以暢其流治黃河則浚雲梯關以通海口築挑水壩開陶莊引河以導其北向築減水壩修鹽河以洩其旁溢於是淮不東漫而北敵黃黃不南灌而東趨海下河七州縣化浸為沃農桑遍野漕艘商舶上下數千里安若衽席其在畿輔之內則隄子牙而漳滏漳沱無泛濫開柳埝口而盧溝不橫決皆

皇考頻年巡省面授經畫用迄於成績勤求民瘼凡所

在暘雨之期封疆大吏隨時奏聞偶有旱潦無不周知賑恤之恩不稽旬日籌畫詳盡溥徧優渥故雖有愆伏而民忘其災遠至蒙古諸藩並厯睿慮分遣使臣教以網罟耒耜之利俾知鮮食艱食每聞積雪荒歉即賜之牲畜米糧咸獲贍給康熙三十六年朝鮮以大饑告截河南漕米由登州汎海發盛京倉儲合水陸運致數萬石平糶賜賚凋瘵盡起舉國忭慶蠲租之詔無歲不下所在災傷見告即與減除積年逋負輒免追征積算無

慮億萬計人用底於殷阜四十八年特勅遞免天下地
丁錢糧三歲而遍八埏之內次第霑被寬仁之澤浹於
黎烝隆冬停流遣之期盛夏解圜圉之禁法司奏讞多
所矜釋和氣薰陶萬方康泰至於三藩之亂所全宥不
可勝紀明降敕諭尚之信耿精忠罪大惡極法應及族
但念尚可喜耿仲明航海歸誠著有勞績其兄弟俱從
寬免罪屬下人有父兄子弟在賊中者一無所問又如
噶爾丹子女赦弗誅俾子有室女有家仍官其子自秦

漢以降叛逆之條蔓及宗族橫枉無辜

皇考弘曠蕩之恩遂除二千年誅戮慘酷之弊慎茲祥刑復於三代興行教化申之以誥誡

御製訓飭士子文刊於學宮

聖諭十六條頒於州縣訓詞深厚丁寧周至士習民風於焉丕變崇敬先師表章前賢東巡狩至於兗州親詣闕里致祭

孔子拜跪之儀有加於往代廣賢裔博士之封宋儒周

邵二程張朱皆稱子而不名升朱子祀於堂壽考作人
開鄉會試者各二十有二科髦俊蔚興相繼輩出增江
浙入學名數廣直省鄉試解額文思光被苗犛之秀隸
籍鬻宮島上君長遣子弟就業辟雍窮山越海靡然向
風右文稽古命儒臣纂修周易折中圖象卦爻之縕親
加論定又修書詩春秋傳說彙纂性理精義朱子大全
經籍之道煥然大明又親授詞臣考訂律歷歷得合天
律詣真度誠萬世不易之法按北極之高測地理南北

東西差得皇輿全圖其他所編輯卷帙繁富充於內府
聽政之暇喜操翰墨文成典誥詩為雅頌書蹟神運天
矩為百代楷模闔五鈞之弓射大鏃之矢發則必中中
必洞貫文事武備並臻其極所謂天縱之聖又多能也
致敬前代禮踰常典自夏商以及元明帝王膺歷服者
咸入廟而享祀焉前後南巡親祭明孝陵者三又欲封
其後裔俾承世祀予小子祇奉遺言錫之侯爵公卿大
臣戎行將帥多服官至四五十年

皇考眷待耆舊恩禮優渥凡朝會讌享麗眉皓首濟濟
盈廷三代而下誠為盛典

皇考自幼齡奉

孝莊文皇后慈訓凡飲食起居視聽言動皆有矩度盛
德自然周旋中禮端宸泣政天顏肅穆雖宮庭間讌一
言一笑不以假人太和元氣充於四體冬不鑪而自溫
夏不扇而手足未嘗濡汗正衣冠尊瞻視終日儼乎若
思逮於耄齡聖敬日躋敦尚儉素衣不辭澣濯食不取

珍異宮掖人數至少光祿寺一歲所費較之前代僅十之一服御器用歷久不易未嘗以故敝棄遺巡幸所至不煩民間一物宮室舟舫純用樸斲無丹青之飾秉德謙冲自平定三逆肅清朔漠凱旋告功及五旬六旬

萬壽節五十六年寶歷國家大慶諸王公文武臣僚太學生徒京兆耆老屢請恭上

尊號雲集闕下備陳丹懇

皇考頻下諭旨讓而弗居於戲惟我

皇考躬備聖德久道化成風教翔洽錫福烝人胥躋於
仁壽乃至鳥獸草木咸若守成之業恢於創造拓開疆
宇廣袤各數萬里在昔未賓之國重譯踵至戴天履地
含生負氣之倫莫不尊親自有生民蓋莫盛於斯日者
然且兢兢業業緝熙單心敬上天之明威察下民之視
聽焦勞萬務未嘗以天位為樂憂勤惕厲以迄於終身
是所以接堯舜禹湯文武孔子之心傳優入聖域而仁
覆天下也康熙六十一年冬十一月甲午崩

聖壽六十有九雍正元年九月丁丑葬

景陵謹拜手稽首而作頌曰

維我皇清

上天眷命二儀凝祉

三朝篤慶

皇考紹烈建中表正亶聰亶明乃神乃聖翼翼昭事仰
格

高穹化將道贊祭以誠通虔承

九廟孺慕

兩宮大孝備矣至德光融爰在冲年夙成睿智致泰之
基徵乎言志日就月將古訓是嗜理數兼該窮源抽秘
萬幾在御八表君臨克勤於政無逸為箴求衣忘食日
昃宵深慮周禹迹事厯堯心廣聽並觀樹旌建鼓無情
不達有善必取四門攸闢百司式叙文采珪璋武羅貌
虎苞有三蘖怙勢悖恩默運神機載奠乾坤旆麾烽熄
弩指鯨奔提封式廓截海為藩元裔速辜不修厥職禁

旅一臨兇渠伏殛羅剎擾邊邊師討賊拔城縱俘感恩
懷德維彼雄梟構難比鄰比鄰內附稽顙稱臣敢抗明
詔怙惡不悛

天子三征掃蕩邊塵蠢茲遺孽構氛西徼自恃荒遐狂
跳縱暴堂堂天兵何幽不到底定三危恩同再造瑤池
之水崑崙之岡窮域絕漠越海踰洋書傳所記咸我畀
章敷天率土無不來王睠念河淮頻乘四載既安二瀆
亦通百派一授成功萬世永賴胥樂同憂仁膏遍沛周

詩時邁虞典歲巡省方詢俗輦路生春蠲租賜復歲有
恩綸惠心溥渥益道平均暘雨偶愆恩澤已布朔漠朝
鮮同霑膏露象魏既懸雞竿屢樹貫索其空桁楊可厝
德惟善政道在遺經紆御束魯親奠兩楹禮明樂備檜
柏增榮光華復旦天下文明覃心四府研精儒術典籍
大興英髦踵出爰在璣衡協時正日玉振金聲審音調
律海涵地負大哉王言鸞鶚鳳翥煥乎宸翰文經武緯
異用同源道高能博藝備德尊歷代帝王祀典彌厚備

列凡筵光延籙豆修敬前朝親臨鍾阜三恪垂封烝嘗
有後功勲耆舊恩禮優容龐眉皓首濟濟雍雍撫謙克
讓川受谷冲穆穆其敬安安其恭六幕啟宇八垓肇域
維我

皇考憂勞靡極三靈集祐五紀膺歷維我

皇考兢勤不息貽我臣庶食德難忘貽我子孫卜世無
彊昌瑞之山峯峙川長功德穹碑天日同光

世宗憲皇帝御製文集卷十三

欽定四庫全書

世宗憲皇帝御製文集卷十四

碑文

歷代帝王廟碑文

歷代帝王崇祀之制肇於唐天寶七載始置廟京城止
及三代以前而已明洪武六年始於金陵立廟嘉靖十
年乃建於京師阜成門內當明初定制時議禮之臣不
能通知大體崇祀祇創業之君從祀惟開國之臣自茲

以後闕焉我

皇考聖祖仁皇帝秉大公之道折衷百代深惟祀典之
宜修康熙六十一年

特頒諭旨命廷臣詳悉從容確議具奏逮朕紹緒之初
廷議始上舊崇祀帝王二十一位今增一百四十三位
舊從祀功臣三十九人今增四十人朕遵奉

先志重書牌位諏吉入廟行祭告之禮仰惟

聖祖皇帝用意之厚立論之正夔乎不可及也夫三代

以上若夏啓之能敬承殷之太甲大戊武丁周之成王
康王宣王頌美詩書光耀史牒三代以下英君哲后或
繼世而生則德教累洽或間世而出則謨烈重光胥能
致海寓之人安躋斯民於康阜嘉言傳於信史善政式
為良規至凡蒙業守成之主即或運會各殊屯亨不一
苟無聞於失德咸帝命所寵綏爰及歷代名臣亦皆川
岳鍾靈為時輔佐功在社稷德協股肱比諸從龍之彥
何多讓焉而尚論未詳明禋久曠其為缺畧也大矣夫

欽崇往哲景企前徽明德可懷羹墻興慕瞻流風之所
被洵歷世而勿諼若乃擴追遠之鴻規破拘墟之臆見
自非忠厚立心寬仁為量卓識超於千古盛德冠於百
王未有能論及此者典禮修明有待今日然則

聖祖皇帝之重加釐定公當周詳誠千萬世莫及之仁
心而千萬世不易之定論也廟貌既新敘述本末鐫於
青珉用昭示久遠焉

黃寺碑文

雍正元年正月喀爾喀澤卜尊丹巴胡土克圖四十九
旗札薩克七旗喀爾喀厄魯特衆札薩克汗王貝勒貝
子公額駙札薩克台吉他布囊等合詞奏言臣等荷

聖祖仁皇帝教誨養育如天覆燾之恩歷六十二年殊
域窮荒溥徧周浹以子以孫世世蒙賴無所申其報效
區區之忱不能自己臣等同心一力合貲凡四萬三千
兩造三世諸佛像八座塔番藏經京城北郭外有原為
達賴喇嘛修蓋之黃寺請以贏財葺而理之丹青黝瑩

煥然以新供佛像寶塔藏經於茲寺臣等感激攀慕之情庶盡涓埃朕惟

皇考聖祖仁皇帝以天下為一家以萬國為一體深仁厚澤所以嘉惠藩服者淪入肌膚骨髓而不可忘也諸藩王等詞語懇切具見誠悃遂允所請命親王大臣往董厥役工既告竣勒文豐碑以揚

皇考功德之隆以表藩服忠愛之篤用昭垂於久遠自今以始爾諸藩王等其益修乃政事撫乃臣庶睦乃隣

封俾民物蕃滋疆宇寧泰恭順述職永享我朝太平之福斯則

皇考陟降之靈日鑒在茲爾諸藩王等其敬念之無斁焉是為記

育嬰堂碑文

朕撫御寰瀛子育兆庶欲使普天之下咸躋仁壽之域
粵稽周禮有慈幼之文載記有養孤之典德意深厚施
及襁褓盖王政之仁雖鳥獸之胎卵草木之萌芽皆為

之教令以愛護之使至於生植而況於人乎國家泰平
日久丁口蕃息或有不能自鞠養者朕惻然念之京師
廣渠門內舊有育嬰堂一區以字遺稚顧其規制未備
所存濟者尚少朕用錫之題額以重其事又賜帑金特
諭府尹重加經理公卿士庶多有捐資為善者凡乳保
醫療之人寒暑衾服之具施設周詳行之可久孔子曰
大道之行也不獨親其親不獨子其子言孝慈之道
廣也詩曰商邑翼翼四方之極言京師者四方之表也

誠使九州之內自通都大邑至於市鎮繁富之所郡縣長吏各殫厥心倣此而推行之倡好義之士弘恤孤之政豈惟保抱携持幼得所養而人人興起其仁心喜於為善則老安少懷風俗益臻醇茂斯朕之所厚望也夫
平定青海告成太學碑文

我國家受

天眷命撫臨八極日月所照罔不臣順遐邇乂安兆人蒙福乃有羅卜藏丹津者其先世固始汗自國初稽首

歸命當時使臣建議畀以駐牧之地其居雜番羗密近
甘涼我

皇考聖祖仁皇帝睿慮深遠每厯於懷既

親御六師平定朔漠威靈所加青海部落札什巴圖兒
等震讐承命

聖祖仁皇帝因沛殊恩封為親王兄弟八人咸賜爵祿
羈縻包容示以寬大而狼心梟性不可以德義化三十
年來包藏異志朕紹登寶位優之賜賚榮其封號尚冀

革心輯寧部衆而羅卜藏丹津昏謬狂悖同黨吹拉克
諾木齊阿爾布坦溫布藏巴札布等實為元惡謂國家
方弘浩蕩之恩不設嚴密之備誕敢首造逆謀迫脅番
羗侵犯邊城反狀彰露用不可釋於天誅遂命川陝總
督太保公年羹堯為撫遠大將軍聲罪致討以雍正元
年十月師始出塞自冬涉春屢破其衆凡同叛之部落
戈鋌所指應時摧敗招降數十萬衆又降其貝勒貝子
台吉等二十餘人朕猶憫其蠢愚若悔禍思愆束手來

歸尚可全宥而怙惡不悛負險抗違乃決翦滅之計以
方畧密付大將軍羹堯調度軍謀簡稽將士用四川提
督岳鍾琪為奮威將軍于仲春初旬禡牙徂征分道深
入搗其窟穴電掃風驅搜剔巖阻賊徒蒼黃糜潰窮蹙
失據羅卜藏丹津之母及逆謀渠魁悉就俘執擒獲賊
衆累萬牲畜軍械不可數計賊首逃遁我師踰險窮追
獲其輜重人口殆盡羅卜藏丹津子身易服竄匿荒山
殘喘待斃自二月八日至二十有二日僅旬有五軍

士無久役之勞內地無轉輸之費克奏膚功永清西徼
三月之朔奏凱旋旅饒鼓喧轟士衆訢喜四月十有二
日以倡逆之吹拉克諾木齊等三人獻俘

廟

社受俘之日臣民稱慶伏念

聖祖仁皇帝威靈震於遐方福慶流於奕葉用克張皇
六師殄滅狂賊行間將士亦由感激

湛恩厚澤為朕踴躍用命斯役也芟夷凶悖綏靖番羗

俾烽燧永息中外人民胥享安阜實成

先志以懋有不績廷臣上言稽古典禮出征而受成於學所以定兵謀也獻馘而釋奠於學所以告凱捷也宜刊諸珉石揭於太學用昭示於無極遂為之銘曰

天有雷霆聖作弧矢輔仁而行威遠寧邇維此青海種類實繁錫之茅土列在藩垣被我寵光位崇祿富負其阻遐禍心潛搆恭惟

聖祖慮遠智周睠念荒服綏撫懷柔朔野既清西陲攸

震爵號旂加示之恩信如何兇狡造謀逆天鼓動昏慙
寇侵於邊惟彼有罪自干天罰桓桓虎豹爰張九伐王
師即路冬雪初零日耀組練雷響鼙鉦蠢茲不順敢逆
戎旅奮張螳臂以當齊斧止如山嶽疾如雨風我戰則
克賊壘其空彼昏終迷曾不悔戾當翦而滅斯焉決計
厲兵簡將往擣其巢踰歷嶽嶇坦若垌郊賊棄其家我
繫而獲牛馬谷量器仗山積蹇兔失窟何所遁逃枯魚
遊釜假息煎熬師以順動神明所福旬日凱歸不疾而

速殪彼逆謀懸首藁街獻俘成禮金鼓調諧西域所瞻
此維雄特天討既申群酋惕息橐戈偃革告成辟雍聲
教遐暨萬國來同惟我

聖祖親平大漠巍功煥文邁桓軼酌流光悠久視此銘
辭繼志述事念茲在茲

黑龍潭碑文

京師之西有黑龍潭焉地靈所鍾實能興致雲雨我
聖祖仁皇帝撫臨萬邦治臻上理軫念羣生每禱於斯

輒有靈應百穀用成康熙二十年乃重建祠廟

御製碑文勒之珉石以昭神庥朕嗣位以來仰體

聖祖之心以為心夙夜孜孜惟冀雨暘時若盈寧康阜
用誠和萬民甲辰春雨澤微愆爰詣茲潭特申祈祝回
鑒之後澍雨應時三月初甘霖叠沛遠近霑足二麥豐
登朝野同聲罔不歡慶蓋感應若斯之捷也朕惟天人
合一之理莫大於誠而幽明昭格之幾莫先於敬傳曰
先成民而後致力於神又曰民和而神降之福朕愛養

元元惟恐一物失所致陰陽之沴而干天地之和故決
歲之中屢下蠲租之詔偶值愆陽見告不憚躬親祝帛
以薦馨香而冥漠之中亦若有盼鑾荅之靈與憑之者
朕因民而祈福於神神惠民而效靈於朕皆默通於誠
敬之中而不疾而速不行而至理有固然無足疑者顧
歲月滋久不更加修葺恐非所以宅明神答靈貺乃命
官庀材經始於二年之三月告成於三年之五月殿廡
門寢煥然一新訖工之日有司磨治豐碑以記請夫禮

有大雩之文詩載同雲之什故祭則受福而有舉必書
且誠敬之念所以交神明格上下用紹我

聖祖仁皇帝軫念蒼生懷保萬民之至意者尤朕所時
厯於中而不能釋也是為記

隆福寺碑文

京城之內東北隅有寺曰隆福肇建於明景泰三年逾
歲而畢工營構之費悉出於官蓋以為祝釐之所自景
泰四年距今二百七十餘年風雨侵蝕日月滋久朕昔

曾經斯寺有感於懷茲乃弘施貲財庀材召匠再造山門重起寶坊前後五殿東西兩廡咸葺舊為新飾以采繪寺宇增輝煥之觀佛像復莊嚴之相既告厥成因勒貞石以紀其事夫佛之為道寂而能仁勸導善行降集吉祥故歷代崇而奉之然朕非以自求福利洪範曰欽時五福用敷錫厥庶民言王者之福被及羣生為大也然惟我

皇考聖祖仁皇帝功德隆厚歷數綿長四海兆人胥登

仁壽之域自古帝王備福之盛無有比倫朕續嗣鴻基
思繼

先志使遐邇烝民嚮教慕義俱植善果各種福田藉大
慈之佑感召休徵錫以繁祉井里安阜耄耆康寧享泰
平之福永永無極則朕所以受

上天之景福承

皇考之慶澤者莫大乎是此朕為蒼生勤祈之至願也
夫

都城隍廟碑文

國家受

天眷命懷柔百神祀典所陳罔不虔肅況畿甸之內輦
轂之間陰陽之所和風雨之所會人民稠集庶物蕃滋
以熙以遊以長以遂佐予茂育厥惟

神庥都城舊有廟祀

城隍之神禮臣以時享薦其內朕慮廟貌不肅展敬無
由雍正四年正月特發帑金命官修飭是年五月告成

土木之工丹雘之飾恢宏鉅麗視昔有加焉足以妥侑
神明壯觀都邑禮臣構亭磐石請賜文以為記朕惟禮
有六祈之祭書有咸秩之文皆以報賽神功為民求福
也方今海內乂安萬物得所豐亨豫大富壽康寧酒醴
牲牷豐潔咸備惟

神實歆格焉而感格之道惟在一誠蓋誠則通通則格
陟降上下錫福在人以致年穀順成閭閻樂業繁禧日
集罄無不宜將朕與百姓咸嘉賴之今廟貌聿新用誌

歲月且令祠官之有事於庭者讀其文皆知設誠於中致恭於外齋明蠲潔克薦馨香副朕敬事神祇之意云

天津海神廟碑文

天津直沽口海神夙著靈應

皇考時以盛京歲偶不登命汎舟輸粟出直沽口浮於遼海達於奉天惟

神効祥三日而至

皇考嘉悅為

神立祠製文勒石昭美報也朕嗣膺大統輯寧兆庶凡天神地祇能為我民禦灾捍患者咸稽舊典加封秩祀况海為百谷王沐日浴月出雲興雨品物遂生其利益於民甚溥而

神休爰敕有司載新祠廟更立豐碑垂示久遠

神其益降嘉祥舟航以通風雨時若永惠我民則朕有

厚望焉

世宗憲皇帝御製文集卷十四

欽定四庫全書

世宗憲皇帝御製文集卷十五

碑文

黃河澄清碑記

朕聞

上天孚佑生民日監在茲垂示休徵警覺有位凡欲使
之懋德勤政無怠無荒而修省加虔用荅嘉貺天人感
應之理致不爽也我

皇考聖祖仁皇帝功德隆盛臨御久長厚澤深仁洋溢於薄海內外朕寅紹鴻圖仰承

盛烈蒙被

福蔭民物阜安數年以來嘉祥疊見乃雍正四年十有二月河道總督齊蘇勒及副總河嵇曾筠漕運總督張大有河南巡撫田文鏡山東巡撫塞楞額陝西巡撫法敏先後馳奏黃河自陝西府谷縣歷山西河南山東以至江南之桃源冰開水清湛然澄澈其在陝西山西始

見於雍正四年十有二月八日乙丑迄於雍正五年正月十三日庚子凡三十有六日其在河南山東始見於十有二月九日丙寅迄於次年正月十日丁酉凡三十有一日山東之單縣亦清於丙寅至癸酉甲戌清澈見底而是月之二十二日己卯漸復其舊凡十有四日其在江南則始於十有二月十六日癸酉迄於是月二十三日庚辰凡七日蓋其清也自上而下及其復舊則自下而上故時日之先後遠近漸次如是維時中外臣民

僉以河清為千年罕見之盛事稽諸史冊咸稱上瑞況
橫亘三千一百餘里繇歷三旬有餘尤亘古所未睹合
詞懇請御殿受賀至再至三朕維上天之錫福降災猶
人君之用賞行罰感召之機分於敬肆一念甫動休咎
頓殊朕祇若

昊天敬慕

皇考翼翼小心夙夜罔有懈怠因得仰邀

皇考昭察默籲

蒼穹錫茲福慶朕惟慮前此之受貺無因且恐將來之承庥不易朝乾夕惕益深謹凜特命虔告

景陵以申忱悃專遣大臣致祭

河神以彰靈應至升殿受賀沿襲頌美之虛文朕所不取是以堅却不允而廣推

皇考錫嘏弘仁施恩中外羣臣有專職者咸晉一階諄諭周詳共加敬勉爰允廷臣所請勒石以紀夫天一生水實為天地之氣所流通而河稱四瀆之宗上應雲漢

澄潔安流用昭嘉瑞

天和協應必有自來詩曰文王陟降在帝左右蓋言文王與天同德而子孫蒙其福澤也我

皇考配

天之靈於昭在上眷顧啓迪至深且厚朕祇承瑞應恐懼悚惶嘉與羣臣增修實政書曰昭受上帝天其中命用休又曰先王奉若天道君臣上下之間無忘戒儆朕亦惟是嚴恭寅畏不遑康寧庶幾求無負於

上天

皇考錫予嘉祥之至意濡毫紀實鐫勒貞珉用抒朕祗敬之誠永自儆勗云爾

北鎮廟碑文

國家敬共明神虔修秩望岳鎮海瀆之祀罔不祗肅醫巫閭山實為北鎮近接興京翊衛關輔曩者

皇考御書扁額以展褒崇復遣官修飭廟貌

御製碑文光昭奕代典至盛矣康熙五十九年朕奉

皇考命恭謁

祖陵於興京道經山麓躬詣展禮瞻仰祠廟蠲潔致禱
因捐貲庀工載加整葺嗣是雨暘時若禾黍有秋遼左
黎元咸沾嘉貺洎朕臨御之初復遣專官董司營治棟
宇榱桷丹雘一新雍正四年冬厥工告成朕惟茲山表
自虞書載在周禮蓋自天地開闢以來靈秀之所萃聚
越數千年神應彰顯而我

祖宗發祥關左豐岐重地王氣所鍾惟

神實為擁護永奠鴻基靈蹟頻昭朕懷允愜展敬之念
夙夜加虔

神其宏敷蕃祉益顯豐功俾方輿之內四序順成百穀
邇遂風雨慶其調和民物樂其康阜洪禧默贊歲事豐
穰慰兆庶依庇之心以稱朕愛育羣生肅奉

靈祇之意式錫琬琰用昭示於億萬斯年

善因寺碑文

洪惟我

皇考聖祖仁皇帝恩被九有威加八紘曩歲厄魯特噶爾丹跳梁朔漠擾亂喀爾喀諸部喀爾喀七旗數十萬衆懷德慕義稽首內附

皇考躬率六軍遠行天討

駐蹕多倫諾爾之地受喀爾喀諸部君長朝謁錫之封爵為我屏垣既剪兇渠蕩定朔漠撫安藩服允從諸部所請爰於斯地創建彙宗寺俾大喇嘛章嘉胡圖克圖居之章嘉胡圖克圖道行高超證最上果博通經品克

臻其奧有大名於西域諸部蒙古咸所尊仰今其後身
秉質靈異符驗顯然且其教法流行徒衆日廣朕特行
遣官發帑金十萬兩於彙宗寺之西南里許復建寺宇
賜額曰善因俾章嘉胡圖克圖呼畢爾汗主持茲寺集
會喇嘛講習經典廣行妙法蒙古汗王貝勒貝子公台
吉等俱同為檀越主人前身後身敬信無二自必率其
部衆聽從誨導胥登善域稽古聖王之治天下因其教
不易其俗使人易知易從此朕續承

先志護持黃教之意也況此地為我

皇考駐蹕之所靈蹟斯存惟茲兩寺當與漠野山川並
垂無極諸部蒙古台吉屬下永遠崇奉歡喜信受薰烝
道化以享我國家億萬年太平之福朕深有望焉

廣寧門外石道碑文

周禮地官小司徒令野修道遂師巡其道修秋官野廬
氏掌達國道路至於四畿禮月令季春之月命司空循
行國邑周視原野修利隄防道達溝瀆開通道路毋有

障塞是知古先聖王經國理民之方纖悉備具至於道途之間咸所加意焉京師為四方會歸萬國朝宗之地我國家幅員廣大軌所同廓於無外梯山航海者聯鑣接軫絡繹而交馳廣寧門其必由之路門外通達輪蹄所踐歲月滋久漸至深窪時雨既降潦水滯注則行旅經涉淹蹇泥淖之中朕甚憫之乃命奉宸苑相度修治自廣寧門至小井村長一千五百丈皆填窪為高砌以巨石其廣二丈九費戶部帑金八萬兩工既竣司役

之臣請紀其事朕宵衣旰食勤求治理凡可以濟人利物者惟恐智慮之未周而施行之不力念茲國門之外輻輳之衢稽於經籍王政所重宜以時修治且期堅固永久使仕宦商旅車馬往來胥由於蕩平正直之路朕心慰焉爰濡筆而紀之詩曰周道如砥其直如矢以是達之天下庶幾經國理民之方莫不備舉云爾

朝陽門至通州石道碑文

自朝陽門至通州四十里為國東門孔道凡正供輸將

匪頒詔糈由通州達京師者悉遵是路潞河為萬國朝
宗之地四海九州歲致百貨千檣萬艘輻輳雲集商賈
行旅梯山航海而至者車轂織絡相望於道蓋倉庾之
都會而水陸之衝達也雖平治之令以時舉行而輪蹄
經涉歲月滋久地勢漸窪入時雨既降積雪初融之後
停注泥淖有一車之蹶需數十人之力以資牽挽者矣
朕心軫念爰命所司相度鳩工起窪為高建修石路計
長五千五百八十八丈有奇寬二丈兩傍土道各寬一

丈五尺長亦如之其由通州新城舊城至各倉門及東西沿河兩道亦皆建修石路共計長一千五十餘丈廣一丈二尺及一丈五尺不等費帑金三十四萬三千四百八十四兩有奇經始於雍正七年八月至雍正八年五月告竣有司請為文以紀其事嘗稽周禮地官司徒令野修道遂師巡其道修鄭鶚疏曰道路以通往來之途使賓至如歸亦修文德以來遠人之意禮月令季春之月命司空循行國邑周視原野開通道路毋有障塞

典籍所垂凡體國經野之政至備具也朕臨御以來詳
求治理早夜孜孜惟恐不逮近而郊圻遠而郡邑即遐
陬僻壤之區其有關於利濟民物者莫不因地制宜以
次修舉是役也遠師古聖王之良法美意而斟酌久遠
一勞永逸良用欣慰庶使遵是路者瞻周道之蕩平正
直咸慶同軌之盛治焉爰誌其歲月而勒諸石云

浙江海神廟碑文

國家虔修祀典以承上下神祇瀆海鎮之神秩祀惟

謹視前代為加隆朕臨御以來夙夜以敬

天勤民為念明神之受職於

天而功德被於生民者昭格薦歆敬禮尤至其為民禦
大灾捍大患合於祭法所載則尊崇廟貌以昭德報功
盖所以遂斯民瞻仰之願而動其敬畏祇肅之心使無
敢慢易為非以得永荷明神之嘉貺意至遠也皇輿東
南際大海而浙江海寧居瀕海之衝龕山赭山列峙其
南颶風怒濤潮汐震蕩縣治去海不數百步資石塘以

為捍蔽雍正二年潮湧堤潰有司以聞朕立遣大臣察
視修築且念小民居恒固知敬畏慢神褻天召灾有自
爰切諭以修省感應之道令所司家諭戶曉警覺衆庶
比年以來徼

明神庥祐塘工完固長瀾不驚民樂其生閭井蕃息越
七年秋汎盛長幾至泛溢吏民震恐已而風息波恬隄
防無恙遠近歡呼相慶謂惟

大海之神昭靈默佑惠我烝黎以克濟此朕念滄海含

納百川際天無極功用盛大

神實司之海寧為海墻劇邑障衛吳越諸大郡海潮內
溢則昏墊斥鹵咸有可虞

神之禦患捍災莫此為大特發內帑白金十萬兩勅督
臣李衛度地鳩工建立

海神之廟以崇報享經始於雍正八年春三月泊雍正
九年冬十有一月告成門廡整秩殿宇深嚴丹雘輝煌
宏壯鉅麗時展明禋典禮斯稱爰允督臣之請勒文穹

碑垂示久遠俾斯民欣悚瞻誦共喻朕欽崇

天道祇迓

神庥懷保兆民之至意相與嚮道遷善服教畏神則
神明之日監在茲顧荅歆饗其炳靈協順保護羣生奠
安疆宇與造物相為終始有永勿替朕實嘉賴焉

關帝廟後殿崇祀三代碑文

自古賢聖名臣各以功德食於其土其載在祀典由京
師達於天下郡邑有司歲時以禮致祭者社稷山川而

外惟

先師孔子及

關聖大帝為然

孔子祀天下學宮而

關帝廟食徧薄海內外其地自通都大邑下至山陬海澨村墟窮僻之壤其人自貞臣賢士仰德誦義之徒下至愚夫愚婦兒童走卒之微賤所在崇飾廟貌奔走祈禳敬畏瞻依凜然若有所見蓋

孔子以聖

關帝以神神之陟降上下顯赫鑒觀以警動覺悟保佑
扶持與斯人呼吸相應答者感而通微而著洋洋乎忠
義正直之氣充塞乎宇宙之間與日月星辰同其明江
河山岳同其體風雷雨露同其功用宜其英靈之振古
常新而為歷代賢豪所莫能並也本朝崇奉典禮綦隆
哉

世祖章皇帝順治九年勅封

神為忠義神武關聖大帝較往代封號尤尊且正京師
白馬關帝廟為奉

神之所歲遣大臣將事惟謹朕續緒膺圖尊隆秩祀登
極之初既加封

先師五代以展尊師重道至意更念

神福國庇民禦災捍患英風冠古浩氣不磨生有自來
鍾靈孔厚宜追封三代晉爵上公爰允禮臣之議加封
神曾祖光昭公祖裕昌公父成忠公博稽史冊名諱弗

傳特用闕疑以彰敬慎虔製

木主於雍正五年六月供奉後殿春秋崇祀著為令典
夫禮繇義起而善則稱先事神事人理無二致

神威靈赫濯昭灼於千萬世則


神之先人享明禋崇美報歷千萬世而勿替以稱國家
昭事

明神之盛典禮制攸宜至宏遠也是用勒文貞石紀奉
祀所始以貽示來茲俾有考焉

欽定四庫全書

世宗憲皇帝御製文集
卷十五

十三



世宗憲皇帝御製文集卷十五

欽定四庫全書

集部

世宗憲皇帝御製文集卷十六至

臣永瑤恭校

侍讀臣孫球覆勘

覆校官主事臣李駿

校對官主簿臣郭祚熾

謄錄監生臣劉能

欽定四庫全書

世宗憲皇帝御製文集卷十六

碑文

修建闕里聖廟碑文

朕惟

上帝垂佑蒸民篤生

至聖先師孔子以仁義道德啓迪萬世之人心而三綱
以正五倫以明後之繼天御宇兼君師之任者有所則

倣以敷政立教企及乎唐虞三代之隆大矣哉聖人之
道其為福於羣黎也甚溥而為益於帝王也更宏宜乎
尊崇之典與天地同其悠久也曲阜廟庭為

孔子里宅毓聖鍾靈之地神典式憑廟貌崇闕由周而
來久且加盛我

皇考聖祖仁皇帝德符元化悟徹性天自義農堯舜禹
湯文武周公之道集成於

孔子者一一體於身心宣為政治聖統在上應運而承

康熙甲子東巡狩

臨幸闕里謁奠廟林殷禮隆儀漢唐莫及朕恭膺丕緒
志切羹牆即位之初加封

先師五代王爵詣雍釋菜題額歌詩佩德報功之願夙
夜罔釋於懷雍正二年闕里

聖廟不戒於火有司奏告朕悚惕靡寧詣

廟致祭旋發帑興修命大臣專董厥役殿廡規模悉準
宮闕製器備物亦令繪圖呈式裁酌協宜數年來諄諭

執事臣寮經營周至纖毫無憾始愜朕衷七年冬有司具奏大成殿上梁前二日慶雲見於曲阜合詞稱瑞朕以天人感應理固不爽而誠敬微忱詎能邀

上帝

先師之垂鑒用是祇將祀事倍增試額俾普天率土被聖人之德化者同心感慶庶足以廣教澤而答嘉庥而撫躬警勉恒朝夕凜凜焉朕嘗謂帝王之尊聖尊其道也尊其道貴行其道居行道之位而能擴充光大達之

政令脩齊治平得其要紀綱法度合其宜禮樂文章備其盛舉凡聖道之未行於當時者悉行於後世雖去聖久遠而心源相接不啻親授於一堂之上默證於千載之前如是欽崇褒顯悉由於中心之誠服而治化日盛聖道斯尊且夫聖人之道一天道也天以牖民之責屬之聖人刪定贊修代天宣教彛倫敦叙禮法彰明後之帝王奉其道以治世師承罔斁資益良多然則尊天尊聖理原合一今茲之崇禮

至聖正所以欽若

昊天而於修建廟庭之重典有不至誠至敬者哉朕勤求上理宵旰孜孜冀以仰述

皇考之鴻謨丕揚

先師之厚澤爰敬推上天篤生聖人與聖人承天立教垂憲奕世之意勒文碑石以昭示臣民於無極而系以辭曰

天心覺世聖治承天治法道法聖聖相傳三五之隆以

道致治峻德弘昭豐功遠被聞知續統

至聖挺生中天復旦文教昌明經緯三才陶融萬象體
具中和功侔參兩表揚六籍程式五常如會滄海若揭
秋陽惟我

皇考聰明睿智苞蘊圖書滙宗洙泗德與聖合禮為道
崇升堂容肅過里恩隆緒續朕躬勤圖紹述至訓煌煌
箴銘宥密維皇建極惟聖時中古今雖邈心理攸同作
帝王師與天地配開闢一人神靈如在奕奕新廟輝映

尼防金絲在御車服盈堂煥乎天文五雲示慶錫祜者
天承庥者

聖敢云瑞應鑒厥微誠普祈洪貺永福編氓文治光華
日星晶麗木鐸揚聲垂億萬世

和碩怡賢親王碑文

朕惟國家啓昌隆之運則誕降名臣祖宗鍾福慶之貽
則篤生賢胄粵若師師虞代稷契為帝室之英濟濟周
朝旦奭是姬宗之彥莫不紀諸謨典頌以聲詩前績可

稽遺編具在如朕弟怡賢親王則於古有光者也王秉
乾坤之清淑萃川嶽之精華爰自幼年早徵至行禁庭
奉

誨循禮度以持躬內殿承

歡篤孝思於繞膝實超出於同氣久默識於中懷是以
績紹之初慎選親賢之寄特加恩命晉授王封正在亮
陰俾膺總理當良奸之雜處以鎮靜服羣情遇綱紀之
待墮以精明襄萬務成勞既著眷倚逾殷綜中外之訏

謨司兵農之大計而王恪勤匪懈兢勵彌深體朕心為
已心視國事如家事詳核度支之積實府藏充盈請蠲
吳越之浮糧問閭康阜興田功於畿內秔稻連疇籌水
利於江南河渠順軌至若邊形指掌瞭大勢於川原武
畧在胸贊成謀於帷幄壯戎容於鴈磧組練鮮明裕軍
實於龍沙驂騶騰躍蒼黔恬樂罔聞徵發之煩朝省安
閒莫見運籌之迹是其潛思默筭備竭精誠故能應變
投機不形聲色者矣扶持正直公道於以昭彰薦達猷

為人材由茲奮起度惟謙挹同事務協於和衷量本寬
洪曹官胥歸於涵茹領周廬之環衛訓練維勤定宮府
之規模施為悉當凡關於民生吏治知無不言曾經其
熟計深圖言皆有效祇慎而不宣於衆退謙而恐居其
名皆中禁之密陳豈外廷之能曉心迹則青天白日食
影無慚節操則瑩玉清冰垢塵不染研幾窮理得聖經
賢傳之精微輔世寧民具帝佐王臣之蘊負道光竹帛
恢平章調燮之勲瑞叶星雲樹喜起明良之範朕實賴

王治安寰寓王實為朕翊贊昇平既歷八年有如一曰
斯乃

上天降佑

烈祖垂庥賚良弼於本支作盛時之梁棟於

皇考為孝子於朕躬為純臣自昔罕倫在今幸覲惠慈
之性宜其克享遐年豈弟之恩足以迓承繁祉人情胥
願天數難齊詎盡瘁以忘軀遂抱疴之纏體禱神祇而
靡應商醫藥而弗瘳王忠愛之忱始終一致沉綿之候

遷避而弗敢上聞危篤之期溘逝而慮傷永訣朕將臨
視王已飄升望幻影於雲中靈竒示象蛻色身於塵界
慧覺超凡生有由來理當可信王幽明感德遠近歸仁
錫命每申則日晴紫陌祖筵方徹則風藹青阡虔叩總
惟動舉朝之痛憶競隨素紼溢長路之悲號嘗賜標題
畧傳梗概忠敬而兼之誠直勤慎而益以廉明禮重易
名約一言而該美善義隆加謚冠八字以示寵褒朕親
奠郊垵頻紆車駕時陳牲醴每遣臣僚敦儉素之風瑩

兆本由於自擇議推崇之典經費優給於官供吉兆既
安豐碑宜勒於戲念股肱之誼重雕刻金鏤憐手足之
情深鋪揚玉牒功高德茂享亘古之鴻聲生榮死哀備
生人之全福將使斯文炳煥偕星曜以流輝貞石嵯峨
與峯巒而並峙云爾

惠濟廟碑文

永定河古所稱桑乾河出太原經馬邑合鴈雲諸水奔
注畿南發源既高滙流甚衆厥性激湍數徙善潰康熙

三十七年我

皇考聖祖仁皇帝親臨指授䟽導之方新河既濬遂慶
安瀾爰錫嘉名永昭底定立廟廬溝橋北題額建碑奎
丈炳耀河神之封實自此始朕纘紹鴻基加意河務設
官發帑深籌䟽築之宜比年以來永定河安流順軌無
衝蕩之虞民居樂業歲獲有秋豈惟人事之克脩實賴
神功之贊佑念石景山據河上游捍禦宜亟爰命相擇
善地作新廟以妥神朕弟和碩怡賢親王躬往營度得

地龐村之西鼎建斯廟長河西遶而南紫峯嶺北紆而左驚控制形勝負山臨流殿宇崇嚴規制宏敞護以佛閣界以繚垣經始於雍正七年冬逾一年役竣復以盧溝神廟

皇考聖蹟所在載加崇飾丹雘維新並增建傑閣翼如煥如稱朕敬神惠民之意爰賜廟名曰惠濟勒文貞珉以紀其事詩稱懷柔百神及河喬嶽河之有神備載祀典况永定為畿輔之名川靈應夙著田疇廬舍繡錯郊

圻其得安耕鑿而樂盈寧者胥仰荷

皇考方畧之昭垂而

明神顯靈默相孚佑蒸黎邀福孔多宜加崇敬今茲十
里內廟貌相望虔修秩祀尚其妥侑歆饗俾斯民康阜
乂安以弘我國家無疆之慶豈惟朕承茲惠貺我

皇考平成之駿烈實嘉賴焉

惠遠廟碑文

我國家受

天眷命撫御寰瀛光被四表莫不尊親

太宗文皇帝崇德七年班禪額爾德尼達賴喇嘛知東土有

聖人遣使通款路涉萬里時經數載始達盛京逮

世祖章皇帝時遂親至京師朝覲備蒙

恩眷後以策妄阿喇布坦肆惡逞奸殘蹂西藏

皇考聖祖仁皇帝特遣大師計日平定撫綏人衆各復生業賜今胡畢爾漢冊印封號安置禪榻重興黃教用

以慰番衆皈依佛法之誠並酬班禪達賴喇嘛累世恭
順之悃也朕御極以來加意護持俾安淨土因思古今
之有佛教特以勸善懲惡濟人覺世為本黃教之傳所
以推廣佛經之旨也演教之地愈多則佛法之流布愈
廣而番衆之嚮善者益衆西藏既有班禪額爾德尼而
近邊之番衆離藏遼遠皆有皈依佛法之心惟茲川省
打箭爐之外有地曰噶達昔年達賴喇嘛曾駐錫於此
爰相度川原創建廟宇發帑金數十萬兩遣官董司工

役依西方白賴本佛廟之圖式凡為殿堂樓房一千餘間又為平房四百間賜額曰惠遠丹艘輝煌器用充備置兵以衛之達賴喇嘛來登禪榻率諸徒衆咸就新居諸番耆幼踴躍忻喜使臣奏言彼土早寒自造寺以來氣候和暖深秋未凍則知茲寺之建神人胥慶山川著靈朕所以仰體

皇考厚酬達賴喇嘛累世恭順之忱且以廣布黃教宣講經典使番彝道俗崇法慕義億萬斯年永躋仁壽之

域則於佐助王化實有裨益是用紀文豐碑以昭示久遠焉

河源神廟碑文

四瀆之中河為大自星宿發源經行數千里而入中國
亘絡坤維澤潤九宇方望之祭三代以來尚矣我國家
敬共明神欽崇祀事精禋昭格靈貺丕彰南北隄工安
瀾底績漕艘利濟輸輓以時以至引河自汕於中泓沮
洳悉淤為沃壤澄清千里經厯三旬上瑞光昭鴻庥屢

著究豫江淮之境各建廟宇春秋展祀尊崇令典視前
代為加虔顧河源所自廟貌闕焉於禮未稱朕念崑崙
遠在荒徼命使不能時至而禹貢有導河積石之文考
其地在今西寧河州境內黃河流入中國自此始則建
廟以祀河源之神實惟茲地為宜廼命禮官詳議敕甘
肅撫臣於河州相度善地恭建新廟高門廣殿肅穆閎
深發帑鳩工專官董役雍正九年冬十月告成朕親灑
宸翰賜額曰福祐安瀾先是諭旨甫頒經營伊始雍正

八年六月之望河州有慶雲捧日之瑞自午至申萬衆
瞻仰七月五日臨洮道臣相地積石關外見河流澄澈
上下百有餘里徹底瑩潔凡三晝夜同時入告共慶祥
符朕惟河嶽山川均為造化之功用而潤澤廣遠利賴
溥被惟河最靈

河神之福國祐民歷有明驗今茲立廟之地顯著休徵
益以知

天心降鑒感則必通神德昭明誠無不格爰誌建廟歲

欽定四庫全書

世宗憲皇帝御製文集

卷十六

十二

月揭諸貞珉兼紀

明神顯應之蹟垂示永久以昭朕夙夜懋勉恭承

天眷敬迓

神庥之至意云

祐寧寺碑文

西寧郭隆寺地處通途喇嘛之自西藏來者於茲取道
為邊陲古刹自羅卜藏丹津之叛結連奸頑喇嘛煽惑
番衆一時蠢動是以大兵進討燒焚寺宇俾奸宄無所

藏匿凶徒既殄邊境救寧梵刹舊基理宜修復爰發帑
鳩工遣官往董其事山門佛殿規制秩然僧舍經堂一
準舊式限令延僧二百人常住薰修宣揚妙法往來梵
衆亦得棲息之所役既告竣以舊稱不雅勅定嘉名賜
額曰祐寧寺並紀文勒石以詔久遠夫黃教之傳盛於
西域凡厥部衆尊崇信奉遠邇一心其為道蓋佛氏之
支流開示迷途因俗利導於治化不為無助書曰惠迪
吉從逆凶惟影響覽茲寺廢興之由順逆之理昭然矣

我國家弘敷德澤以振興黃教綏撫番彝繼自今其恪
守清規虔修梵行諸部落皈依崇奉之願久且益堅將
見鴻慈普佑永戴清寧茲寺與西土山川同其悠久可
也

廣惠寺碑文

黃教之興盛於西土其道根源天竺演說因果覺悟羣
生使為善者知勸作惡者思懲與作善降祥作不善降
殃之理默相符會所以易俗移風裨助於王化為益弘

矣西寧舊有郭莽寺地處通途為邊方古剎從西藏進口之喇嘛皆於茲托足即佛家所謂十方院也自羅卜藏丹津悖義作逆茲寺奸頑喇嘛相與連結煽動部落遂使修行之區轉為藏奸之藪是以大兵進討除其衆而燬其寺所以鉏惡止亂非得已也邇來氛翳廓清疆土寧謐宜振興黃教以綏撫番彝爰發帑金遣官往為重建佛殿經堂僧舍山門規模復舊丹牖一新常住之僧以二百人為限俾其宣揚妙法且使往來僧衆有所

樓憩董役之臣請易嘉名賜額曰廣惠寺所望重建之
後遐邇番彝一心信奉敦崇善行以延慶祐永享我國
家億萬載太平之樂是朕錫福蒸民躋諸仁壽之意也
紀文勒石用昭示於久遠焉

太上清宮碑文

天師張道陵漢時煉丹成道得神授秘文祓除陰慝通
靈變化享壽百二十有三子孫世嗣其法所傳經籙符
章印劍代以一人典之弟子法官轉相師授其教以忠

孝正直感動神明安善驅邪佑民護國君臣父子倫叙
秩然閱數十傳神應如響是以歷朝重之世襲真人之
封於今勿替貴溪龍虎山者天師煉形修丹之地元壇
丹竈在焉後即其地建上清宮唐宋元明以來代有修
建我朝康熙二十六年

聖祖仁皇帝親灑宸翰賜號碧城並頒太上清宮扁額
錫帑金以修葺殿宇歷年已久宜事鼎新朕特發內帑
專遣廷臣前往重修增飾廟貌又以斗為帝車羣生之

所托命復令相方卜址創建斗殿以為祈禳善地葺工
庀材百堵偕作宏敞堅固煥如翼如經始於雍正九年
五月明年七月工竣復賜田三千四百餘畝以永為世
業夫天師以忠孝為道法之宗自東漢迄今千五百年
法裔相仍克修緒業効忠闡教捍患除災蓋其精誠所
感實足以通貫幽明知鬼神之情狀故能常垂宇宙裨
益聖功福國濟人功驗昭著太上清宮為神祇之所陟
降法籙之所憑依福地仙都山靈擁護增新崇構典禮

攸宜是用紀事述丈勒諸貞珉以昭示永久俾知國家
酬庸報功弘獎忠孝之至意云爾

世宗憲皇帝御製文集卷十六

欽定四庫全書

世宗憲皇帝御製文集卷十七

碑文

高家堰碑文

黃河為運道民生所關而治河以導淮刷沙為要高家
堰者所以束全淮之水并力北趨以入河河得清淮則
沙不積而流益暢故考河道於東南以高堰為淮黃之
關鍵淮自中州挾汝潁渦汴諸水匯注於洪澤一湖蕩

激滌洄浩渺無際而淮揚兩大郡居其下流惟恃堰堤
以為障禦所繫詎不重哉我

皇考聖祖仁皇帝為億兆蒼生籌萬世永賴之計屢勤
清蹕指示臣工方畧昭垂神謨卓越全河形勢經畫周
詳而高堰隄工尤厯

睿慮迄今數十年來河臣遵守成規列郡得安衽席者
皇考聖績神功之所賜也朕紹承鴻緒注念河防思高
家堰隄工綿遠保護維艱惟不惜多費帑金全建石工

使高厚堅固久遠可恃斯於運道民生實有裨益朕衷
默定詢度僉同爰特發帑金庀材鳩役專命大臣董其
事經始於雍正八年二月越雍正十年六月大工告竣
仰藉

神庥風濤恬靜薪石雲集工作易施增卑而高培薄而
厚易圯而新孔固孔完其增廣皆有加於舊凡六千三
百四十餘丈延袤四十餘里所費帑金一百一萬餘兩
於是高堰之工訖然為淮揚巨障河臣上言大工之成

不可無紀用俞所請摛文勒石以示朕宵旰疇咨之至
意冀河流濟運永慶安瀾保障無虞民生樂業以無忝
皇考底定平成之績云爾

拈花寺碑文

昔我

世祖章皇帝萬幾餘暇留神內典其時法門龍象受知
最深者曰玉琳琇國師嘗欲令其徒茆溪森主席京師
宣揚道法眷顧之意至厚朕閱玉琳茆溪語錄嘆其高

風卓識超冠叢林因為頒諭表章追封賜祭以仰承

世祖皇帝優崇正梵之至意既又念直省剝寺碁布開
堂秉拂者日衆而禪宗愈衰是以再三誥誡俾各勤求
本分直透向上一關仍擇宗門法侶具正知正見者為
之表率倡導焉京師內城西北隅有護國報恩千佛寺
者創自前明歷百有六十載琳宮頽敝鐘鼓寂寥爰命
重加修整經始於雍正十一年正月本年九月告成梵
宮禪宇煥儼輝煌堪為大衆熏修忝學之所因擇琇國

師下法嗣名超善者命主方丈錫寺額曰拈花揭之山
門粵自世尊以正法眼藏涅槃妙心實相無相微妙法
門囑付摩訶迦葉迨香至來茲震旦提唱宗乘為不立
文字教外之別傳迄今數千年靈山一會儼然未散髮
陀優鉢徧滿寰區日月星辰山河大地人民六畜城郭
市廛有情無情即色非色處處是拈花道場法會剌剌
是拈花時節因緣物物是如來手中之花塵塵剌剌有
調御丈夫人天師宛爾拈出但須本分衲僧瞥然薦取

便續從上以來諸祖心燈如或未能則叅須真叅悟須
實悟三藏十二分千七百則公案不出此二字字中有
大海潮音噌吰訇訇震諸人耳根字中有大摩尼珠晃
朗照耀奪諸人眼識蓋執指忘月便是二鐵圍山見月
忘指便是曹溪一滴也居此寺者尚其證琇國師之所
證入此大圓覺海步步踏得正修行處不負世尊當日
拈花示衆與

世祖皇帝護持佛法深恩以為直省剝寺倡朕有厚望

焉

賢良祠碑文

朕惟國家鍾昌隆之運誕降賢臣宇宙成熙皞之風端
資良弼故徽聲聿播旂常銘勒於生前而元祀攸崇俎
豆歆承於身後用以寵褒已往勸勵方來所由沛殊恩
舉曠典也爾和碩怡賢親王忠孝自天敬勤成性嘉猷
入告啓乃心以沃朕心庶績咸熙圖國事即如已事勲
高燮理立臣道之儀型禮極哀榮備人生之祉福爾大

學士公圖海等際王迹肇基之始業贊運籌當皇朝一
統之期績參佐命我

皇考聖祖仁皇帝繇膺歷祚簡公卿以翊昇平載定宸
瀛選將帥而宣威武中朝外任多令名清節之完人跨
海窮邊著破敵開疆之偉畧朕眷懷舊德詢訪僉謀既
祠宇之告成叙官階而列位於戲念鴻功於同氣自古
希倫追盛烈於羣賢於今不泯綸章丕錫永垂圖牒之
輝珉石深鐫式煥星雲之色凡百有位其咸觀感於茲

昭忠寺碑文

朕惟疆場用命因敵愾以効忠行陣爭先值臨危而殉
節追尋壯槩殊切軫懷載建豐碑用光崇祀爾和碩敬
謹親王尼堪等賦姿雄毅秉性堅貞均際會於從龍各
圖功於汗馬我國家蕩平區寓命上將以專征綏靖邊
陲張王師而捷伐戈鋌所向旋見廓清貔虎前驅一惟
奮勇或氣凌勁寇縱橫萬衆之中或志銳先登出入重
圍之內王公將帥既赴義以如歸裨校卒徒亦銜恩而

自矢勵致身之素志蹈刃何辭耿報國之丹誠嬰鋒不
顧芳名常著摛文宜付於史官英爽猶生勤事允符於
祀典乃者構成棟宇羅設几筵考厥官資定其位次握
麾擁節並盱烝於一堂擢甲荷戈得從班於兩廡懸之
巨榜表厥忠勲錫以綸章昭茲節烈於戲華楹敞朗長
迴日月之輝雕琰嵯峨永壯風雲之色聿傳久遠式載
寵榮

普陀山普濟寺碑文

普陀洛伽山為觀音大士示現之地歷徵靈應自梁貞明中始立佛寺宋元以來代加修葺我

皇考聖祖仁皇帝巡幸浙西遣官興建殿宇上為

皇太后祝禧

御題賜額勒文豐碑以紀其事山靈擁護聖績丕昭朕
續紹鴻基於茲十載念茲山為古聖道場重以

聖祖仁皇帝宸翰留貽尤宜敬謹崇奉爰特發帑金重
加修飾專官往董其役經始於雍正九年九月雍正十

一年六月告成朕惟天下名山大川皆扶輿清淑之氣
磅礴而融結普陀秀峙海壖迥立於天風濤浩泝無
際之中尤靈秀所萃聚宜其為仙真之所栖息況大士
以慈悲濟物為心隨聲赴感無所往而不在其示現在
一時實無時而不示現神通感應不可思議即示現與
不示現舉可不論也夫佛法廣大無邊大海包涵無際
億萬百千里不足以測海之廣而一勺未嘗非海也億
萬百千法不足以盡佛之相而一法無適非佛也今以

大海視普陀一拳石耳而菩薩現像之場善衆皈依之地
泛慈航於彼岸結寶筏於迷津證普度之慈緣顯弘
深之願力珠宮在望香界重新寧不與鷲峰鹿苑均為
淨域之名區也歟用為斯記鐫諸翠珉以志靈山之勝
槩

普陀山法雨寺碑文

法雨寺者普陀山大士之別院也

皇考聖祖仁皇帝既修建普濟寺上為

慈聖祝禧復念茲寺為海氛所震蕩發帑重新俾僧徒
得所栖止

賜額立碑增輝瀛嶠歷今已數十載宜加崇飾朕特遣
專官賫內帑庀材鳩工不勞民力香林梵宇丹雘煥然
與普濟寺大工同時告竣督臣請摛文勒石以紀夫大
士以慈緣普濟度盡衆生為願朕嘗繹法雨之義謂濟
物之普遍者莫如雨當夫慈雲布護甘露滂沱高下遠
近一時霑足凌霄聳壑之喬柯勾萌甲坼之微卉華葩

果蔬無不濡被潤澤發榮滋長暢茂條達各遂其性而不自知假使物物而雨之朝朝而溉之將不勝其勤而終不足以徧給惟本大慈悲現大神力周遍一切在在具足所謂天降時雨山川出雲膚寸而合不崇朝而遍乎天下者濟物之功莫大於是神山寶剎縉侶雲集自當有被時雨之化證心印而傳法乳普利生之實用以不負大士隨緣接引之慈恩而副朕弘振宗風護持正覺之至意者朕深有望焉

崇恩寺碑文

崇恩寺在江南荆溪之磬山故明天隱修禪師演法道
場也禪師與密雲悟同得法於龍池幻有傳具正知正
見以本分事接人不墮語言窠臼其著述單提直指洞
本通微得從上之正傳於禪宗實有裨益漢月藏悖負
本師恣其狂臆用知解心設穿鑿法一時毒霧紛迷教
外別傳之旨幾晦密雲悟憫其誑世惑人大聲疾呼一
聞再闢而禪師同心應和復為釋疑普說以斥其謬當

時之人眼目不具莫辨金鑰然雖一時未能遽掃霧霾而辨異闢邪之卓見護持正印之苦心洵可稱盲俗之金鑰法門之大匠也禪師一傳為玉琳琇國師再傳為茆溪森禪師並蒙

皇祖世祖章皇帝恩遇顧問提唱宗乘不墜家風向非禪師眼目淨正法乳純真後代兒孫能若是傑出乎朕間披閱琇森父子語錄益知其淵源所自有不可誣者寺在磬山去縣三十餘里舊制湫隘不足容叅學徒衆

爰命擴舊易新增葺殿宇經始於雍正十一年越明年
二月告成有司請勒碑以紀緣起朕念義興山水靈秀
古德高人時所棲託自龍池藻源天童磬山皆生其地
相繼建大法幢震大法雷以開示正法眼藏甚勤且力
斯寺之建豈無紹祖燈續佛慧擔荷大事無忝前修者
勅興其間乎若徒以增輝梵剎崇飾講堂為山門標榜
不肯真參實悟則辜負朕恩與魔外所見無異是昔者
乃祖磬山之所深訶也念之哉

報恩寺碑文

古德有云行解相應謂之為祖又云明道者多行道者少可知心性邊事固貴眼明必須踐履行不應解定非真解明而不行豈是真明昔人十二時中並無雜用心處又謂數十年始得打成一片皆為此也朕於玉琳琇國師蓋不勝仰止之歎焉國師紹法磬山年始二十有四即開堂於吳興之報恩寺提唱宗乘惟以本分事激發學者其自勵四誓與答客問七諦當因課誦示衆語

自為為人悉皆如實具足無一虛字舞弄狂機疑悞後
學實叅實悟真修真行我

世祖章皇帝慕其名德延入內廷對

御敷陳無非道要朕嘗擬於黃帝之訪崆峒成湯之問
隨光惟

皇祖究竟真宗故能得此大士而國師實能無忝

恩遇始終無一言一行世諦流布與本分間隔洵不謬
為佛祖兒孫人天眼目者矣朕既選其語錄刊布叢林

復念報恩法席宜加修整爰命有司庀材增葺以昭我
皇祖尊崇有道相得益彰之盛軌抑茲寺也磬山修先
嘗演法而玉琳琇繼之所謂白雲千頃老屋數間一榻
高眠令土木瓦石為大衆轉大法輪者磬山之家風也
合諸檀越建大禪堂十方聚會應時及節為大衆說法
者玉琳之行履也今磬山玉琳皆已入大般若涅槃而
白雲如故木石依然法堂之鐘鼓重開十方之善信不
少大衆入此門來還見種種轉大法輪相否還聞時節

說法無量音聲否如果親見親聞則報恩法會儼然未散只在本人當下領取以毋負國師常住切實為人處是所望於努力修持者

十方普覺寺碑文

西山壽安有唐時古剎以窣堵波為門泉石清幽層巖夾峙乃入山第一勝境寺在唐名堯率後曰昭孝曰洪慶曰永安實一寺也中有旃檀香佛像二其一相傳唐貞觀中造其一則後人範銅為之皆作偃卧相橫安寶

牀俗稱卧佛見於紀載詩歌者屢矣歲久頽圯朕弟和碩怡賢親王以無相悉檀庀工修建嗣王弘皎弘曉繼之捨貲葺治於是琳宮梵宇丹雘煥然遂為西山蘭若之冠工既竣命無闕永覺禪師超盛往主法席夫象教之設所以顯示真宗佛身充滿於法界普現一切羣生前隨緣赴感靡不周而恒處此菩提座是以造像多為五色蓮臺結跏趺座而茲獨示卧相者其義何居善見毘婆沙律釋佛遊王舍會城謂遊有四一者行二者住

三者坐四者卧以是四法名之曰遊然則豎窮三際橫
亘十方惟一真心泯絕對待應緣現迹任物成名凡此
四威儀邊在在三摩鉢地如玉鏡之交照似寶珠之五
色非同非異非即非離居斯常寂光中便是毘盧頂上
今者石泉流於舍下木葉飄於巖間非王舍衛城行法
遊乎塔鈴少選而聲銷磬角無風而動息非王舍衛城
住法遊乎行者住者如是坐者卧者同然矣夫虛空無
相不拒諸相發揮法性無身匪礙諸身顯見果能不起

有情無情之妄想不生心內心外之邪思將一法纔通
萬像悉歸心地千途並會光明遍滿恒沙此七寶牀上
古佛現前丈六金身蓋覆大地占斷三際不往不來豈
非一佛卧遊十方普覺歟因名之曰十方普覺寺而勒
是語於碑並記朕弟和碩怡賢親王修寺緣起以示來
者

紫陽道院碑文

性命無二途仙佛無二道求長生而不知無生執有身

而不知無相法身如以箭射空力盡還墮非無上至真
之妙道也道祖云外其身而身存豈非世尊無我而有
我之旨乎又云觀空亦空空無所空所空既無無無亦
無無既無湛然常寂夫此湛然常寂豈非常樂我淨
之妙諦乎彼夫滯殼迷封癡狂外走者烏能測知萬一
哉大慈圓通禪仙紫陽真人張平叔著悟真篇發明金
丹之要自序以為是乃修生之術黃老順其所欲漸次
導之至於無為妙覺達摩六祖最上一乘之旨則至妙

至微卒難了徹故編為外集形諸歌頌俟根性猛利之士因言自悟於戲若真人者可謂佛仙一貫者矣紫陽生於台州城中有紫陽樓乃其故居去郡城六十里有百步溪傳為紫陽仙化處又嘗焚修於桐柏崇道觀歲久香火岑寂特命發帑遣官載加整葺夫以真人靈源朗徹決定無生三界十方隨心轉用何有於蟬蛻之鄉更何有於塵棲之迹特以朕景仰高蹤表其宅里俾學道之士人人知此向上一路千途同軌非可強分區別

自生障礙庶幾真人揅迷覺世之薪傳不泯於後也自
紫陽樓迄百步溪崇道觀三處各為殿堂門廡若干楹
併置田若干畝以資香火有餘則以贍其後裔雍正十
二年二月經理告竣爰誌其緣起而刻諸石

天竺寺碑文

浙中多名山古寺天竺乃昭著之大刹也湖山明秀勝
地鍾靈觀音大士歷徵顯應奇木妙相舍利瑞光普現
弘慈久而彌彰有感必通如響斯捷

皇考聖祖仁皇帝巡幸浙西重新香界

御製碑文照耀穹宇為

慈聖祝釐為蒼生祈福意至厚也祝融不戒宜事鼎新
爰因總督李衛之請命發帑金載加修葺雍正十二年
十一月工竣璇題朱網丹雘煥如遠近人民瞻仰歡悅
用勒文翠珉以紀其事夫佛法廣大無邊不可思議而
大士慈悲為念隨聲赴感普濟羣生是以善信皈依有
求輒應然天人感召之理無他曰誠敬而已矣當其誠

心懇至雖以愚夫愚婦之微賤而冥漠之際呼吸相通
如其不然即有靈明響應悲憫救護之聖心亦不能強
迷頑者而施之惠澤故曰神無常享享於克誠又曰至
誠而不動者未之有也不誠未有能動者也夫斯人生
享太平之福日用飲食一絲一粟在在皆天地覆載之
恩即在在皆明神庇祐之力使非時存敬信之心好善
遠罪以迓福祥而獨於祈禱迫切之時奔走膜拜冀邀
鑒格則誠意微薄豈能感應尚安望休祥之敷錫乎是

以大士之慈悲靈聖振古如茲而斯人之昭受神庥必
由自致誠能虔敬居心實力嚮善消除惡念廣種福緣
則善氣和會感致繁禧大士慈恩降祥錫祉年豐物阜
風雨以時衍蕃昌而躋仁壽朕愛養黎元之至意其深
慰矣夫

世宗憲皇帝御製文集卷十七